



Nafar Kronika

Aitor Arotzena

Inauteri klasiko eta modernoak

Eratsun eta Orabidea aldean, bertze herri batzuetan bezalaxe, urtearekin eta euroarekin batera ailegatu ziren Inauteriak. Aste hondar honetan, mendi aldeko Inauteri entzutetsuenak ailegatuko dira: Ituren eta Zubietakoak. Asteburua puxka biltzen ibili ondotik, astelehenean Zubietako joaldunek bisita egingen diete iturendarrei, bidean Aurtizko joaldunak bilduz. Asteartean, bisita bueltatu egingen diete iturendarrek zubietarrei, oraingoan ere bidean duten Aurtizko joaldunak bilduta.

Joaldunek gain, narraskeria klase guzietarik egiten dituzten moztorroak izanen dira inauteetako protagonista. Inauteri moderno-zeagoak ere ikusgai izanen dira aste hondar honetan. Igandean, azken urteetan hainbat ospe eta arrakasta lortu duten Sunbillaiko karrozak izanen dira ikusgai, gainezka egingen duten herriko karriketan. Karroza eta moztorroa aukeratzea izanen da, hain zuzen, egunotan aunitzen buruhaustea. Egingen nuke apustu hainbat Bin Laden, taliban edo euro ikusiko ditugula karrika bazterretan, telebistako saio arrakastatsuren bateko protagonistekin batera.

Bertze jantzi tipikoa erromatarrarena izan ohi da, baina Nafarroako Gobernuak ez luke begi onez ikusiko. UPNkoak haserre daude erromatarrek Nafarroari egin dioten ekarpenarekin: nola demontre gogoratu zitzaizen erromatarrei Iruñeko Gazteluko plazaren azpian bainuetxea eraikitzea? Gaur egun, enparantza honen obrei buruzko erreferenduma eskatu duten taldeekin bat egin nahi al zuten Julio Cesar eta konpainiak? Noski, erromatarrek ez zuten autoendako parking-en beharrik... Asterixek —eta Yolanda Barcinak— erranen lukeen bezala, zoratuta daude erromatar hauek. Baina Iruñeko alkatesak erantzun egin die lanekin segitzea kritikatzan diotenei: parkingeko lanak egin ez bagenitu, nola jakinen genuke hor azpian zegoen altxorra? Hiriarrendako beharrezkoa den aparkalekua egin eta plaza oinezkoendako moldatzeaz gain, historia jakiteko baliagarria izanen dira obrak. Honek ez du moztorro beharrik!

gure aukerak

MUSIKA

- **Iruñea:** Escarabajos taldeak Txantreako Akelarre tabernan joko du, gaur, 21:00etan.
- **Larraga:** Cuerno de Chivo taldeak Ibiza tabernan joko du, gaur, 23:30ean.
- **Bera:** Atzokoak abesbatzak kontzertua eskainiko du, bihar, 20:00etan, Kultur Etxean.

HITZALDIAK

- **Lizarra:** Emakume Abertzaleon Topaketa Feministen ondorioak aurkeztuko dituzte, gaur, 18:00etan, Emakume Asanbladako lokalean.
- **Iruñea:** Bihar, 16:30etik aurrera, Floren Aoizekin kafe-tertulia egingen dute Aitzina tabernan, *Ezker Abertzalearen historiaz*.
- **Iruñea:** Astelehenean, Jesus Altuna arkeologo eta irakasleak *Gure historiaren hasieran* izeneko mintzaldia eskainiko du, 20:00etan, Erraldioen Txokoan.
- **Iruñea:** Ostegunean, Jon Alonso idazlea *Euskal Karma eta Agur, Darwin* bere azken bi liburuez solastatuko da, Zaldiko Maldikon, 20:00etan.
- **Zangoza:** Ostegunean, Aingeru Epaltzak Nafarroako elebitasunaz hitz egingen du, Kultur Etxean, 20:30ean.

ANTZERKIA

- **Iruñea:** Hortzmuga taldeak *Badum mundua* haurrentzako lana taularatuko dute, bihar, 12:00etan, Mikael aretoan.
- **Iruñea:** Txamuskina taldeak *Mohikano antzerkia* izeneko helduentzako lana eskainiko du, asteazkenean, Nafarroako Antzerki Eskolan, 20:30ean.

IKASTAROAK

- **Iruñea:** Otsaila eta martxo bitartean, Gazteriaren Etxean egingen dituzten ikastarotetan izena emateko epea ostegunean akituko da: eskal dantzak, tai-chi, makillajea, eskulanak eta pintura. 14 eta 30 urte bitartekoei zuzenduta daude, eta matrikula 22,30 eurokoa da.

ERAKUSKETAK

- **Iruñea:** Javier Gamez mendizalearen *De los susurros del camino* izeneko argazki erakusketa hila akitu arte izanen da, Nafarroa Kirol Elkartearen (Jarauta, 78), astelehenean ostiralera, 19:00etatik 21:00etara.
- **Bera:** Julio Caro Baroja

Etnografia museoak antolatuta, otsailaren 2a arte *Nafarroa Etnografikoa. Iragina gogoan* erakusketa izanen da, Kultur Etxean, astelehenean larunbatera, 18:00etatik 20:00etara.

- **Burlata:** Fermin Biurrarena artistaren margolanak Joakin Azkarate karrikako kultur aretoan izanen dira, otsailaren 3a arte; asteartetik larunbatera, 19:00etatik 21:00etara, eta jaiegunetan, 12:00etatik 14:00etara.

- **Iruñea:** Adolfo Lahoza aragoiarraren margolanen erakusketa otsailaren 8a arte izanen da, Hezkuntza Departamentuko klaustro gaineko galerian. Lanegunetako goizetan bisitatzen ahal da.

- **Zangoza:** Hainbat artista garaikideren lan grafikoa biltzen duen *Suite Olympic Centennial* izeneko erakusketa otsailaren 12a arte izanen da, Kultur Etxean, asteartetik larunbatera, 19:00etatik 21:00etara.

- **Barañain:** Izarren herria eza-gutzeko *Planetario bidaia* erakusketa Kultur Etxean izanen da, otsailaren 22a arte.

BESTELAKOAK

- **Iruñea:** Nafarroako Goi Mendi Eskolako eski kolaboratzaile izateko eskaerak aurkezteko epea zabalik da. Curriculumak Mendi Federazioaren egoitzan eman behar dira (Paulino Caballero, 13).

Asteko erakusketa

Jon Landa

Zer: Jon Landa artista arabarraren olio margolanak; hiriko irudiak.
Non: Ormolu galerian (Paulino Caballero, 42).
Noiz arte: Urtarrilaren 31 arte.

